

**Bangunan Umno Di Kedah Disembur Kata Nista
Bernama
6 Januari , 2012**

ALOR SETAR, 6 Jan (Bernama) -- Beberapa bangunan milik Umno Kedah disembur cat dan kata-kata nista terhadap parti itu menjelang keputusan mahkamah pada Isnin ini berhubung kes liwat melibatkan ketua pembangkang Datuk Seri Anwar Ibrahim.

Turut menjadi mangsa ialah kenderaan orang awam serta bas yang disembur cat warna hitam dengan perkataan "Bebaskan Anwar" dan "Gerakan 901".

Bangunan Tunku di sini yang menempatkan pejabat Badan Perhubungan Umno Kedah, Lembaga Kemajuan Wilayah Kedah dan Bank CIMB, disembur perkataan memburukkan Umno, Barisan Nasional dan Perdana Menteri Datuk Seri Najib Tun Razak serta isteri Datin Seri Rosmah Mansor.

Bangunan Umno Padang Terap di Kuala Nerang dan bangunan Umno Kubang Pasu di Jitra turut menjadi sasaran kumpulan tidak bertanggungjawab yang menyembur perkataan serupa.

Umno Kedah membuat laporan polis di Balai Alor Setar, Kuala Nerang dan Jitra, pagi ini.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=638267>